

1877—1878 թթ. ՌՈՒՍ-ԹՈՒՐԿԱԿԱՆ ՊԱՏԵՐԱԶՄԸ
ԵՎ ԲՈՒՂԱՐԱՆԱՅԵՐԸ

Զ. Մ. ՂԱՍԱՐՅԱՆ

Բոսնիայի և Հերցեգովինայի 1875 թ. և բուլղարների 1876 թ. Ապրիլյան ապստամբությունները իրենց վրա բեկեցին Ռուսաստանի և ամբողջ Եվրոպայի առաջադեմ մարդկանց ուշադրությունն ու զայրույթը՝ արյունալի կոտորածների կազմակերպման առիթով:

Ռուս հասարակությունն առաջինը բողոքի ձայն բարձրացրեց թուրքական բարբարոսների կողմից կիրառվող՝ ժողովուրդների բնաջնջման քաղաքականության դեմ: Սուլթանական բռնապետության դեմ ծավալված շարժման մեջ ընդգրկվեցին ռուսական մշակույթի ու գիտության այնպիսի հսկաներ, ինչպիսիք էին Լ. Ն. Տոլստոյը, Ֆ. Մ. Դոստոևսկին, Ի. Ս. Տուրգենևը, Յ. Ն. Պոլյանսկին, Դ. Ի. Մենդելևը, Ի. Մ. Սեչենովը, Վ. Մ. Բեխտերյովը: Հետագայում Վ. Մ. Բեխտերյովը դարձավ 1877—1878 թթ. ռուս-թուրքական պատերազմի մասնակիցը, ղեկավարելով ռուսական բժշկական գումարտակը:

Ենիշերիների ու բաշիբոզուկների կամայականությունների և սարսափելի կոտորածների դեմ իրենց վրդովմունքն ու զայրույթն արտահայտեցին նաև համաշխարհային առաջադեմ մտքի ներկայացուցիչները Ֆրանսիայում, Իտալիայում, Անգլիայում, Հունգարիայում և այլ երկրներում:

Ռուսական մամուլը առանձնապես ողողվեց բազմաթիվ հոդվածներով, որոնք պահանջում էին դադարեցնել արյունահեղությունները և օգնության ձեռք մեկնել օսմանյան լծի տակ հեծող ժողովուրդներին: Պետերբուրգում, Մոսկվայում, Ռոստովում և Ռուսաստանի այլ քաղաքներում, տարբեր կաղամակեքությունների նախաձեռնությամբ, Ապրիլյան ապստամբությունից տուժածներին ցույց տրվեց նյութական օգնություն: Ռուս-թուրքական պատերազմի նախօրեին զանազան հանգանակություններից հավաքվել էր 14 միլիոն 500 հազար ռուբլի, 62155 փութ շաքար, 71539 փութ վարսակ, 20000 գլուխ խոշոր և 6000 մանր եղջերավոր անասուն և այլ մթերքներ¹:

Ապստամբ բալկանյան ժողովուրդներին օգնելու գործին մասնակցեցին նաև Անդրկովկասի ժողովուրդները, հատկապես հայերը: Հայկական պարբերականներում լայն արձագանք գտան բուլղարների հերոսական ելույթները: Թերթերի էջերում հանդես եկան բազմաթիվ հայ մտավորականներ (Մ. Փորթուգալյան, Գրիգոր Արծրունի, Ստ. Պալասանյան, Ռ. Պատկանյան և շատ ուրիշներ), որոնք ջերմորեն ողջունեցին հերոս ժողովրդի պայքարը: Նրանց հոդվածներն ու ելույթները հսկայական նշանակություն ունեցան ապստամբության մասնակիցների և տուժողների օգտին միջոցներ հավաքելու գործում: Զգալի գումարներ հավաքվեցին Թբիլիսիում, Վանում, էջմիածնում, Կոստանդնուպոլսում և այլ քաղաքներում:

¹ См «Работническое дело», София, 1977, май 17.

1876 թ. Ապրիլյան ապստամբության թեժ օրերին Պլովդիվի (Ֆիլիպե) վիլայեթի քաղաքներում ու գյուղերում (Պանագյուրիշտե, Պաղարջիկ, Կոպրիվշտիցա, Բրացիգովո, Բատակ, Պերուշտիցա և այլն) բնակվող հայերն անձնուրացաբար օգնեցին ապստամբության մասնակիցներին: Խաչեր Վարդազարմյանը, Գևորգ Ռուսչուքլյանը, Գրիգոր Զաքրըովը, Կարապետ Փափագյանը, Արթին Իրիգիկովը և շատ ուրիշներ հարյուրավոր բուլղար ապստամբների և նրանց համախոհների փրկեցին կախաղանից, գնդակահարությունից ու աքսորից:

Բուլղար ժողովուրդը իր ազատագրության գործը կապում էր Ռուսաստանի հետ, քանի որ Ապրիլյան ապստամբությունը վերջնականապես ապացուցեց, որ սեփական ուժերով հնարավոր չէր թոթափել օսմանյան դարավոր լուծը: Կարլ Մարքսը և Ֆրիդրիխ էնգելսը նշել են. «Սերբը, բուլղարացին, Բոսնիայի ռայան, մակեդոնացի ու թրակիացի սլավոն գյուղացին մեծ աղպային համակրանք են տալիս դեպի ռուսները...: Ինչ էլ որ լինի նրանք Պետերբուրգից են սպասում մեսիային, որը փրկելու է նրանց բոլոր չարիքներից»²:

Ինչպես հայտնի է, 1877 թ. ապրիլի 24-ին Ռուսաստանը պատերազմ հայտարարեց Թուրքիային: Ռուսական բանակների զորակոչման և համալրման ընթացքում կազմակերպվեցին բազմաթիվ կամավորական ջոկատներ ու զնդիր բուլղարներից, ուկրաինացիներից, ռումինացիներից, սերբերից, մակեդոնացիներից, չեռնոգորցիներից, հուլներից, հայերից ու այլ ժողովուրդներից, որոնք դարերի ընթացքում պայքարում էին օսմանյան տիրապետության դեմ:

Ռուսական գլխավոր հրամանատարությունը, հաշվի առնելով կամավորական խմբերի և աշխարհազորների ստեղծման հսկայական նշանակությունը, հատկապես այն ժողովուրդներից, որոնց երկրներով շարժվելու էր ռուսական բանակը, բոլոր միջոցներով օժանդակում էր նրանց զինմանն ու ղեկավարմանը:

Պատերազմի ընթացքում ստեղծվեց բուլղարական աշխարհազորը, որը բաղկացած էր 6 գումարտակներից՝ մոտավորապես 7444 հոգուց³: Քիշինևը հանդիսանում էր բուլղարական կամավորների հավաքատեղին: Նրանց գլխավոր հրամանատարը գեներալ Ն. Գ. Ստոլետովն էր: Աշխարհազորի կազմակերպման ու զինման գործում նրան ղգալի օգնություն ցուցաբերեց Մոսկովյան սլավոնական կոմիտեի նախագահ Բ. Ս. Ակսակովը:

1876—1877 թթ. ձմռանը, Ապրիլյան ապստամբության պարտությունից հետո, Բուխարեստում գործող Բուլղարական բարեգործական կենտրոնական միությունը կազմում էր ապագա զորագրվողների ցուցակները: Ցուցակադրվում էին բոլոր այն բուլղարները, որոնք ապստամբությունից հետո ապաստանել էին եղբայրական Ռուսաստանում և հյուրընկալվել Ռումինիայում: Աշխարհազորը բաղկացած էր գյուղացիներից, արհեստավորներից, ուսուցիչներից և ուսանողներից: Բուլղարական գումարտակները, որոնց թիվը Բուլղարիայում ավելացավ ևս 6 զորաբաժիններով, ռուսական բանակների

² К. Маркс и Ф. Энгельс, Сочинения, т. 9, էջ 9:

³ «Руско-турската освободителна война 1877—1878 гг.», София, 1977, էջ 50:

շարքերում հերոսական մարտեր մղեցին Սուլեյման փաշայի գերազանցող ուժերի դեմ Շիպկայի և Ստարա Ջագորայի մոտ: Նրանք թույլ չտվեցին թուրքական բանակին հասնել Պլեվենում շրջապատված Օսման փաշայի զորքերին, որոնք հուսահատ մարտեր էին մղում պաշարումից դուրս գալու համար:

Այդ նույն ժամանակ Կովկասում ռուսական բանակի հետ միասին թուրքերի դեմ կռվում էին բազմաթիվ հայեր, որոնց մասնակցությամբ զգալի օժանդակություն էր Հայկական լեռնաշխարհում ռուսական բանակների առաջխաղացման համար⁴: Բազմաթիվ հայ սպաներ ու շարքայիներ մարտնչում էին նաև Բալկանյան ռազմաճակատում: Դժբախտաբար հայտնի չեն բոլորի անունները: Միայն զոհվածների ու ծանր վիրավորվածների ցուցակներից պարզվում են որոշ մասնակիցների անունները: Պլեվենի անհավասար մարտերում, օրինակ, սպանվում է Բաթբեուկ Մելիքովը, որ ծառայում էր որպես շտաբս-կապիտան՝ 120-րդ Սերպուխովյան գնդում: Նույն մարտերում ծանր վիրավորվածներից էր 121-րդ Պենզենյան գնդի կապիտան Պողոսովը: Պլեվենի մարտերում են զոհվել 6-րդ Լիպավյան գնդի կապիտաններ Լորիս-Մելիքովը և Մարկոսովը⁵: Պլեվենի մարտերում շրջապատված և գերված Օսման փաշայի ձեռքից սուրբ վերցնում է ռուսական բանակում մարտնչող հայորդի Միքայել Չերկեզը: Մարտից հետո գնդապետ Չերկեզը ստացավ դեներալ-մայորի ասսիճան և պատերազմին մասնակցեց մինչև հաղթական ավարտը: Շիպկայի հերոսամարտերում զոհվում է մայոր Լազարևը: Բուլղարիայի առանձին քաղաքների գրավման ժամանակ Պլովդիվում զոհվում են Պավլովյան գնդից Հայկանովը և Տատյանը: Նույն մարտերում են զոհվում 47-րդ Ուկրաինական հետևակային գնդից Ավետիկովը, ռուսական բանակի կապիտաններ Սերվինյանը և Հախվերտովը⁶: Ռուս-թուրքական պատերազմի զոհվածների հիշատակին Պլեվենում կառուցված դամբարանի մարմարե տախտակների վրա ռուս, ուկրաինացի, ռումինացի, սերբ, հույն, չեռնոգորցի, մակեդոնացի, բուլղար մարտիկների շարքում փորագրված են հայորդի շտաբս-կապիտաններ Բաթբեուկ Մելիքովի, Մարկոսովի և Լորիս-Մելիքովի անունները:

Պատերազմին իրենց մասնակցությունը ցուցաբերեցին նաև Բուլղարիայում ապրող հայերը: Պլովդիվի, Պազարջիկի, Վառնայի, Կավառնայի, Ռուսեի, Բերկովիցայի և այլ վայրերի ազատագրման մարտերում նրանք զանազան ծառայություններով օգնում էին ռուսական բանակներին, նպաստելով նրանց առաջխաղացմանը: Պատերազմի ընթացքում բազմաթիվ բուլղարահայեր, որոնք գտնվում էին թուրքական վարչական ծառայության մեջ և բանակում, լքում էին իրենց պաշտոնն ու ծառայությունը և անցնում ռուսական բանակի կողմը:

1877 թ. Ստեփան Դ. Աբղարյանը թուրքական բանակի 204-րդ գնդի հաշվետարն էր Բերկովիցա քաղաքում: Ռուս-թուրքական պատերազմի օրերին գորագնդի հրամանատարը որոշում է կոտորել քաղաքի բուլղար բնակչությունը և այրել այն: Ստեփան Աբղարյանը իմանալով այդ, բուլղար միտրոպոլիտի հետ գնում է փաշայի մոտ և համոզում, ասելով, որ թուրքական զորամասի

⁴ Ս. Գ. Ներսիսյան, Հայ ժողովրդի ազատագրական պայքարը թուրքական բռնապետության դեմ 1850—1870 թթ., Երևան, 1955, էջ 200—201:

⁵ С. Овнян, Армено-български исторически връзки, София, 1972, № 126

⁶ Նույն տեղում:

նահանջը ձևական և ժամանակավոր բնույթ է կրում, հետևաբար միտք չունի քաղաքը այրել և կոտորել բնակիչներին, քանի որ նորից վերադառնալու են Բերկովիցա: Փաշան համոզվում է և հեռանում քաղաքից: Ստեփան Աբգարյանը փոխանակ մեկնելու թուրքական նահանջող բանակի հետ, անցնում է ռուսական զորքերի կողմը: Հաջորդ օրը ռուսական բանակը աղատագրում է Բերկովիցա քաղաքը⁷:

1877 թ. հուլիսի 5-ին ռուսական զորաբաժինը Սվիշտովը դրավելուց հետո պարտության մատնեց Աբդուլ Քերիմ փաշայի 80-հազարանոց բանակը և դրավեց Բյալա քաղաքը: Այնուհետև ամուր հենակետ ստեղծելով Յանտրա դետի ավազանում, նա ճանապարհ հարթեց դեպի Ռուսե (Ռուսչուք): Մարտերը շարունակվեցին մինչև ուշ աշուն:

Ժամանակակից Ռուսեի Ս. Աստվածածին հայկական եկեղեցու ավագ քահանա Կարապետ Պոյաճյանը հետևյալ ձևով է նկարագրել այդ մարտերը. «...Յամին 1877, պատերազմ հրատարակեցավ ընդ մէջ Ռուսաց և Օսմանոց. մեծատունքն քաղաքիս (խոսքը Ռուսչուք քաղաքի հարուստ հայերի մասին է.—Ձ. Ղ.) ցրուեցան յայլ եւ այլ կողմանս, որ ի Շումնու (Շումեն), որ ի Կոստանդնուպոլիս եւ որ ի հեռւոր վայրս, եւ մնացի աստահօր ընդ աղքատիք գասակարգութիւնս ժողովրդոց:

Ահեղ պատրաստութեամբ եկն եհաս բանակն Ռուսաց եւ ճակատեցաւ առ ավամբ դետոյն յայնկոյս Դանոբա ի կողման Ռումանիոյ. եւ տաճիկք նախայարձակ լեալ մերթ ընդ մերթ ի վերայ նոցա արձակէին զուժքս իւրեանց որոտընդոստ ճայթմամբ, որպէսզի արգելցեն զձեռնարկութիւն նոցա: ...Ահ եւ սարսափ տիրեաց ի վերայ բնակչացն, կեսարացի Անվար բաշայն արտաքսեաց Կմեղ ի քաղաքէս, բաց ի զօրականացն ոչ զոք եթող. մինչեւ շմնալոյ եւ ոչ մի»⁸:

Այնուհետև Կարապետ Պոյաճյանը խոր վշտով նկարագրում է հայերի բռնազաղիւր քաղաքից, որոնց մեծ մասը հաստատվում է Չերվենա վոդա գյուղում: Այստեղ, ռազմաճակատից հեռու, հայերը մնում են մի քանի ամիս՝ մինչև ռուսական զորքերի կողմից Ռուսչուքի գրավումը: Նրանցից ոմանք, ծանոթ լինելով թուրքական բանակի դիրքերին և սպառազինությանը, այդ մասին տեղեկություններ են հաղորդում և զործակցում բուլղարների հետ: Հայերից շատերը անձնուրացաբար կատարում էին զանազան ծառայություններ, վստանգի ենթարկելով իրենց կյանքն ու բնական զորքերի ապահովությունը: Այդ համագործակցությունը չէր վրիպել թուրքական իշխանությունների ուշադրությունից: «Օր մի բարկացեալ էր ընդհանուր հրամանատար Ահմետ բաշայն ի վերա Յակոբայ Դադանճեան, վասն բարեկամաբար վարելոյն ընդ բուլղարս, հրամայէ Անտոն պէյին դրեալ թուղթ արքորանաց. եւ իմ լուեալ դալս փութացեալ գնացի առ Օսման բաշայն եւ աղաչեցի. զի ներումն շնորհեացն. ...եւ այլվոք բազմօք հաճեալ զմիտս ատենակալաց. պատառեցու թուղթն արքորանաց եւ ազատեցաւ»⁹:

⁷ «Երևան», Սոֆիա, 1 մարտի 1963:

⁸ Կարապետ Պոյաճյան, Պատերազմն ընդ մէջ Ռուսաց և Օսմանոց յամի 1877—1878 (այս ձեռագիրը մեզ սիրով նվիրեց բուլղարահայ բանասեր-պատմաբան Ներսես Գասպյանը):

⁹ Նույն տեղում, էջ 5:

1878 թ. փետրվարի 7-ին ռուսական բանակի զորաբաժինները մտան Ռուսշուք։ Բռնագաղթի ենթարկված բնակչությունը, այդ թվում և հայերը, վերադառնում են քաղաք և՛ զիմավորում հաղթական զորքերին։ Ականատեսը այսպես է նկարագրել ռուսական բանակի մուտքը Ռուսշուք։ «.....Ի բազմութենէ դօրաց եւ դօրապետաց երկիրս զղրղէր, եւ երկինք թնդացին ի ձայնէ հնչանց փողոց, փանդոանց եւ այլոց նուագարանաց։ Մտանք յեկեղեցին բոլղարաց, ժէնէրալ Թօթլէպէն եւ այլ բարձրաստիճան պաշտօնական մարմինք ընդ նմա, զօրք շրջապատեալ զփողոցսն, մինչեւ յերեկոյ գային զօրքն եւ լնուին զքաղաքն. յորս էր Աստրախանցի Գրիգոր աղա, որդի Տէր Ահարոն քահանայի Դադաշեանց, եւ երկու բժիշկ։ Հայնժամ փառատրական մաղթանս կատարեաց Արհիմանտրիտն, եւ ի վերջին Քարող խօսեցաւ՝ զտառապանսն զոր կրեցին, գեղեցիկս նկարագրելով, եւ զշնորհակալութիւն իւր յայտնեաց վասն Քրիստոսազօր եւ Աւգոստափառ Թագաւորին Ռուսաց, եւ զօրաց նորին՝ որք զարինս իւրեանց նուիրեցին ի փրկութիւն բոլղար աշխարհին, եւ ի փառս Քրիստոնէութեան»։ Շարունակելով իր պատմությունը, ավագ քահանա Կարապետ Պոյաճյանը հաղորդում է. «Հետոյ ժէնէրալ Թօթլէպէն՝ վասն իմ հարցանէ առ վարդապետն եւ ասէ. ո՞վ էր այն որ ընդ քահանայս ձեր այլատարազ զգեստիւք երեւէր, պատասխանէ Արհիմանտրիտն թէ Հայոց քահանայ էր. յայնժամ վերստին ասէ ժէնէրալն. թէ երեւի սիրով էք ընդ միմիանս. այո՛ ասէ վարդապետն. ...Եւ մեծամեծ անձինք ընդ Թօթլէպէն իջաւանեցան յապարանս Մ. Ստեփանեանց, յանդիման տան մերում»¹⁰։

Կարապետ Պոյաճյանի ձեռագրից պարզվում է, որ Ռուսշուքը գրաված ռուսական զորաբաժնում եղել են աստրախանցի Գրիգոր Դադաշյանը և երկու հայ բժիշկներ, որոնք, ինչպես ասված է ձեռագրում, եղել են կաթողիկոս Ներսես Աշտարակեցու բարեկամները։ Հետաքրքիր են այն տողերը, որտեղ դեներալ Տոտլեբենը նկատում է հայ և բոլղար հոգևորականների միմյանց նկատմամբ տաժաժ սերն ու հարգանքը։ Պարզվում է նաև, որ ռուսական բանակի հրամանատարները իջևանել են Ռուսշուքի հայտնի հայերից Մ. Ստեփանյանցի ապարանքում։ Փետրվարի 9-ին գեներալ Տոտլեբենը Մ. Ստեփանյանցի տան դահլիճներից մեկում հրավիրում է քաղաքի բոլոր մեծամեծներին՝ թուրք, բոլղար և հայ ժողովուրդների ներկայացուցիչներին։

«... Ընդ երկարութիւն դիւանին կարգեցաք կանգնեցաք իւրաքանչիւր ազգ զատեալ ի միմեանց. յոյժ դարմանալի էր տեսարանն՝ զի երեսք ոմանց առ խնդին զուարթանային, եւ կէսք գլխիկոր եւ տխրադէմ զաշն անգամ ի վեր ամբառնալ ոչ կամէին. բայց եւ այնպէս իւրաքանչիւր զօրք եւ զօրապետք, ազգք եւ ազինք համազգեստիւք իւրեանց եւ պատուանշանօք զարդու զարգարեալ. եւ յոսկէվառ հանդերձից նոցա փայլատակունք հատանէին. Եւ մինչդեռ այսպէս սխրացեալ կայր կանառն, յառաջ մատեան բաշայք եւ ըստ հրամանի կայսերն իւրեանց յանձնեցին զՌուսջուգ եւ զհամայն Բոլղարիա. ի ձեռս Տերամբ զօրացեալ բարձր բազկացն Ռուսաց. Խօսել կալաւ ժէնէրալ Թօթլէպէնն ի ռուսաց բարբառ եւ ասէ. «Արարիչն տիեզերաց՝ որ այսօր զայս երկիրս պարգևեաց մեզ կառավարել ըստ կամաց իւրոց. ձեզ ասեմ, ո՞վ բնակիչք երկրիս. այսուհետեւ եղբայրօրէն եւ խաղաղութեամբ կենցաղավարեսցիք ընդ միմեանս, վնաս ինչ ոչ արարեալ ումեք. եթէ ոք անաստեալ

¹⁰ Նույն տեղում, էջ 8։

հրամանաց մերոց դիմակաց լիցի, սևաստիկ պատիժս կրէ. ջնջի՛ք ի մտաց ձերոց, թէ վերստին երկիրս այս անցանէ ի ձեռս օսմանցւոց. Աստուած պարգեւեաց մեզ այժմ. Եւրոպէական ազգաց թագաւորութիւնք եւս հաստատեցին եւ վավերացուցին. հնազանդ եւ հպատակ կացջի՛ք հզօր եւ անխոնարհելի Աւգոստափառ կայսրութիւնն Ռուսաց»¹¹:

Հանդիսավոր այդ խորհրդաժողովի մասնակից ավագ քահանայ Կ. Պոլսեցիներ աշխատեցնելու է. «Ոչ վարդապետն բոլորաց ասաց ինչ, եւ ոչ ես, բայց ես ի կացեալ տեղւոջ իմում ի պատրաստի էի. եթէ ինձ եւս հարցանիցին ինչ. տալ պատասխանի: Եւ դմտաւ ածեալ խորհէի, իզէ՞ թէ լինիցի օր, եւ Հայաստանի տեսնէի ալսպէս»¹² (անշուշտ Կ. Պոլսեցիների այս խոսքերը վերաբերում են Արեւմտյան Հայաստանին.—Ջ. Ղ.):

1877 թ. դեկտեմբերին, ռուսական զորքերը, անցնելով ձյունապատ Բալկանյան լեռնաշղթան, Եւրոպական հարթավայրում ընդհուպ մոտեցան Պլովդիվին: Դեկտեմբերի 31-ին գնեբրալներ Գուրկոն և Կարցևը շրջապատեցին Պաղարջիկը: Սուլեյման փաշան Շիպկայի և Ստարա Զագորայի մարտերից հետո թողեց հիմնովին այրված Ստարա Զագորան, համախմբեց ջարդված զորաբաժինները և շտապեց դեպի Պլովդիվ՝ ռուսական բանակների հաղթական երթը կասեցնելու համար, ճանապարհին մոխրակույտերի վերածելով զյուզերն ու բնակատեղիները:

Սուլեյման փաշայի բանակները պատրաստվում էին այրել Պաղարջիկը և կոտորել բնակչությունը, սակայն սպասում էին կարգադրության Կոստանդնուպոլսից: Այդ թեժ օրերին Պաղարջիկի կայսրանապետը և հեռագրատան միակ աշխատողը Հովհաննես Սվաճյանն էր: Գիշերը, երբ հեռագրատան փոքրիկ ընդունիչը հաղորդեց շարաքստիկ լուրը՝ «Կոտորել Պաղարջիկի բնակչությունը և այրել քաղաքը», Հովհաննես Սվաճյանն առանց տատանվելու փաշային հաղորդեց հակառակը. «Զկոտորել բնակչությունը, թողնել քաղաքը»: Թուրքական բանակը հեռացավ քաղաքից: Առավոտյան, հունվարի մեկին, Պաղարջիկի բնակչությունը գրկաբաց դիմավորեց հաղթական ռուսական զորքերին:

Բուլղարիայի ազատագրումից հետո, երբ բուլղարական իշխանությունները իմացան անվեհեր հալի այդ հանդուգն սխրագործության մասին, նրան աշխատանքի նշանակեցին Բուլղարական երկաթգծի վարչությունում, իսկ նրա մահից հետո Պաղարջիկի քաղաքային համայնքի խորհուրդը, ի նշան երախտագիտության, քաղաքի փողոցներից մեկը կոչեց Հովհաննես Սվաճյանի անունով¹³:

Իր սխրագործություններով պատերազմի ընթացքում բուլղար ժողովրդի համակրանքը վայելեց Երանոս Երանոսյանը՝ Կավառնայի մարտերում, Թագվոր էլմասճյանը, Արթին Կիզիկովը, Կարապետ Պողոսյանը, Կարապետ Թագվորյանը, Մանուկ Հինգլյանը՝ Պլովդիվում:

Երանոս Երանոսյանը ծնվել է Վառնայում: Իր ժամանակին հայտնի բուլղարահայերից էր և թուրքական տիրապետության ժամանակ աշխատել է որ-

¹¹ Նույն տեղում: Ըստ ձեռագրի Տոտլերենի ճառի թարգմանությունը ավագ քահանայի համար կատարել է բուլղարացի Ստոիլ էֆենդին:

¹² Նույն տեղում:

¹³ «Слово», София, 1939, февруари 18.

պես փոստ-հեռագրատան վարիչ Բալչիկում: Շնորհիվ իր պաշտոնի ու դիրքի նա օժանդակել է բուլղարների ազատագրական պայքարին: 1877 թ., երբ ռուսական բանակը շարժվում էր դեպի Վառնա, Երանոս Երանոսյանը տեղեկանում է, որ թուրք բաշիբոզուկները պատրաստվում են կոտորել Կավառնայի քրիստոնյա բնակչությունը: Առանց ժամանակ կորցնելու, ղենքը ձեռքին նա մեկնում է Կավառնա և մասնակցում այնտեղ ծավալված մարտերին: 1877 թ. հուլիսին նա սպանվում է թուրքերի կողմից: Բուլղարիայի ազատագրումից հետո Կավառնայի քաղաքային համայնքի որոշմամբ քաղաքի փողոցներից մեկը անվանվեց Երանոսի անունով¹⁴:

Պողոս էլմասճյանը, նախքան Բուլղարիայի ազատագրումը, ավարտել էր բուլղարական դպրոց և հիանալի տիրապետում էր բուլղարերենին: Պատերազմի սկզբին փոստ-հեռագրատան պատասխանատու աշխատակից Պ. էլմասճյանին թուրքական իշխանությունները որոշում են տեղափոխել երկրի խորքը՝ հեռու ռազմական գործողություններից: էլմասճյանը զգալով նրանց մտադրությունը, որոշում է անցնել ռազմաճակատ և միանալ ռուսական զորքերին: Այդ նրան հաջողվում է և նա մասնակցում է Բուլղարիայի ազատագրման մարտերին: Բուլղարիայի ազատագրումից հետո ռուսական հրամանատարությունը էլմասճյանին նշանակում է Պլովդիվի փոստ-հեռագրատան բաժնի վարիչ: Նա մեծ հարգանք էր վայելում ինչպես ռուսական հրամանատարության, այնպես էլ բուլղարական իշխանությունների կողմից¹⁵: Նա պարգևատրվել է բազմաթիվ շքանշաններով ու պատվոգրերով:

Բուլղար ժողովրդի սերն ու հարգանքն էր վայելում Կարապետ Թագվորյանը: 1877 թ. նա թուրքական իշխանությունների կողմից ժամանակավորապես նշանակվում է քննիչ՝ Պլովդիվի դատարանում: Որպես այդպիսին նա կախաղանից փրկում է բուլղար մի շարք հեղափոխականների, որոնք մասնակցել էին Ապրիլյան ապստամբությանը և շարունակում էին մնալ երկրում: Խաղվորյանի ջանքերով շատ բուլղար ապստամբներ ազատվեցին մահապատժից:

Արթին Գիդիկովը ծնվել է Քիշինևում 1813 թ.: Ավարտել է տեղի միջնակարգ դպրոցը, հիանալի տիրապետում էր ռուսերենին: Երիտասարդ Գիդիկովը թողնում է իր ծննդավայրը և բնակություն հաստատում Պլովդիվում: Զբաղվում է առևտրով և դառնում քաղաքի ազդեցիկ հայերից մեկը: Ռուսական քաղաքացիություն ունեցող Արթին Գիդիկովը սերտ հարաբերությունների մեջ էր Պլովդիվում ռուսական կոնսուլ Նադեժդ Գերովի հետ: 1876 թ. Ապրիլյան ապստամբության օրերին նա տասնյակ բուլղար ապստամբների փրկում է կախաղանից, օգտագործելով իր դիրքն ու ազդեցությունը: Այդ օրերին ձերբակալված մարդկանցից էր նաև հայտնի նկարիչ Ստանիսլավ Դոսպենսկին, որին ևս նա փրկում է գնդակահարությունից: Ի նշան երախտիքի, վերջինս նկարում է Գիդիկովի դիմանկարը: Այն սխալանվել է և այժմ ցուցադրվում է Պլովդիվի քաղաքային թանգարանում: Ռուս-թուրքական պատերազմի ժամանակ Արթին Գիդիկովը կարևոր տեղեկություններ էր տալիս ռուսական հրամանատարությանը: Ազատագրումից հետո այն փողոցը, որտեղ գտնվել է նրա տունը, վերանվանվել է նրա անունով: Այժմ այդ տունը

¹⁴ Նույն տեղում:

¹⁵ «Поход», София, 1941, апрел 27.

վերածված է տուն-թանգարանի: Երկհարկանի այդ շենքը գաղափար է տալիս ազգային վերածննդի ժամանակաշրջանի բուլղարական ճարտարապետության և քաղաքաշինության մասին: Արթին Գիդիկովը վախճանվեց 1896 թ. Պլովդիվում¹⁶:

Ռուսլուքի ավագ քահանա Կ. Պոյաճյանի ձեռագրում կարդում ենք. «Յառաջին իշխանութիւն ամբարձաւ Տօնտուքով Կորսաքով, առաջին Քնեազ նըստաւ յԱթոռն Բուլղարիոյ. ընդ առաջ ելաք սոյա շուրջառագգեստ, աղ եւ հաց՝ ըստ սովորութեան մատուցին Բուլղարք. բարի գալուստ մաղթելով, ծանոյց զմեզ Գրիգորիս մետրոպոլիտն եւ ծանօթացոյց առ մեծափառ իշխանն. եւ յերեկոյն միում ի մեծ ընթրիսն հարիւրաւոր արամբ՝ սեղանակից եղաք...: Իջեալն սորա էր ի մեծի տան Կարապետ Մ. Ստեփանեանց, զի քան զայս փառաւոր տուն ոչ գոյր ի քաղաքիս: Ըստ պահանջելոյ քաղաքականութեան ի ժամանակին յայնմիկ. էջ յիշխանական Տօնտուքով Կորսաքով, եւ ի տեղի նորա յաջորդեաց Աղեքսանդր Բատեմբերգ, աղ եւ հաց հանեալ արծաթի սկտեղը մատուց թաղապետն բարի գալուստ խնդրելով ի բարձրելոյն, եւ մեք շուրջառագգեստ ընդառաջ ելաք ընդ քահանայս Բուլղարաց. ու ինքն Տօնտուքով ծանօթացոյց զմեզ, զՀովհաննես վարդապետն եւ զիս առ Աղեքսանդր Բատեմբերգ յայնմ փառապանծ գալստեան, յայնմ օրէ եւ ապա յոյժ սիրէլ զմեզ Բատեմբերգ Քնէազն»¹⁷:

Ռուս-թուրքական պատերազմի ավարտով բուլղար ժողովուրդն ազատագրվեց հինգդարյա թուրքական լծից: Այդ հաղթանակի գործում նրան օգնության ձեռք մեկնեցին բոլոր եղբայրական ժողովուրդները, առաջին հերթին ռուս մեծ ժողովուրդը, որը հսկայական զոհերի գնով վերացրեց օսմանյան ստրկությունը Բալկաններում:

«Ռուսաստանի արևելյան քաղաքականությունը օբյեկտիվորեն խթանում էր Մերձավոր Արևելքի պրոգրեսիվ զարգացման ուղղությանը, երբ եվրոպական երկրների արևելյան քաղաքականությունը ներծծված էր պահպանողական ոգով, որը ձգտում էր պահպանել նեխող Օսմանյան կայսրության ամբողջականությունը, հակադրվելով զարթոնք ապրող, կենսունակ ու առաջադեմ բալկանյան ազգերին»¹⁸:

1877—1878 թթ. ռուս-թուրքական պատերազմը ունեցավ նաև այն նշանակությունը, որ օբյեկտիվորեն նպաստեց Բուլղարիայում և բալկանյան մի շարք երկրներում բուրժուա-դեմոկրատական հեղափոխության որոշ հարցերի լուծմանը՝ վերացրեց սուլթանական-կալվածատիրական ֆեոդալական կարգերը, ճանապարհ հարթեց կապիտալիզմի զարգացման համար: Խոշոր բեկում կատարվեց բուլղար ժողովրդի պատմության մեջ:

¹⁶ «Слово», София, 1939, февруари 18.

¹⁷ Կ. Պոյաճյան, նշվ. աշխ., էջ 13:

¹⁸ В а с и л К о л а р о в. Избрани произведения, т. III, София, 1956, էջ 393:

РУССКО-ТУРЕЦКАЯ ВОЙНА 1877—1878 гг. И АРМЯНЕ В БОЛГАРИИ

З. М. КАСАБЯН

(Резюме)

В своей освободительной борьбе против османского ига болгарский народ всегда рассчитывал на братскую помощь России. Дружба и взаимопомощь возросли во время русско-турецкой войны, когда русский народ ценой больших жертв освободил Болгарию от пятивекового турецкого ига. В этой войне рядом с русскими, болгарами, украинцами, румынами, сербами, македонцами, греками, черногорцами воевали и армяне. В боях на Шипке, при Плевне, Пловдиве, Варне, например, погибли Бажбеук-Меликов, Погосов, Лорис-Меликов, Маргосов, Лазарев и другие.

Армяне принимали активное участие в Апрельском восстании и русско-турецкой войне. Болгарский народ чтит память Оганеса Сваджяна, Ераноса Ераносяна, Артина Гидикова, Тагвора Элмасджяна, Карапета Тагворяна, Манука Хиндляна, Хачера Вардазармяна и других. Многие армяне, уцелевшие от турецких погромов и резни, нашли убежище в братской Болгарии после ее освобождения.